

# 7avel Top Pop Rumantsch: Il mund dir e fin dals AndaRojo

■ (cp) Suentar ina pausetta da stad è la retscha da Top Pop Rumantsch puschè enavos sin il palc. Ed er questa giada cun in'ivetta musicala tut speziala. La setavla ediziun da quest project ambizius dal Radio Rumantsch è deditgada a la gruppa da rock AndaRojo. La preschentaziun da ses toc «Muond in mai» coincidea cun la partenza da la band per in «viadi da studi» en l'America latina. Il mund musical dals AndaRojo sa preschenta detg dir ed offensiv. Uschia tuna er lur chanzun «Muond in mai», registrada per Top Pop Rumantsch. Ella reflectescha ultra da quai il spiert democratic da la giuvna gruppa grischuna; il toc è naschì dad in «jam», vul dir dad ina improvisaziun spontana en il tschaler d'emprova al Bogn Ragaz. Chantadur *Roland Vöggtli*, il nuschegl rumantsch da la band, ha lura agiuntà in text adequat, adressà principalmain als numerus fans dals Rojos: «En noss concerts emprendin nus ad enconuscher fitg blera gliued e tuts avessan gugent anc dapli da nus, e quai ma renda mintgatant trist». L'appel da reunir «frars e sours, baps e mammas» ad ina famiglia armoniusa, è da fatg ina



La gruppa da rock AndaRojo è naschida l'avrigl 2005, unind quatter musicists da diversas entgarnas geograficas.

MAD

pitschna bella expressiun da tendresse juvenila, che cuntrastescha a la direzza musicala dal refrain. A la fin stat il giudizi filosofic ch'il mund ston'ins mintgamai cumenzar a midar tar sasez. Roland: «Pir cur ch'jau sun mez cuntent poss jau cuntentar vus auters».

## AndaRojo (andaroho)

La gruppa da rock è naschida l'avrigl 2005, unind quatter musicists da diversas entgarnas geograficas. Ghitarrist *Roland Vöggtli* è oriund da Scuol, organist *Johi Rauber* abitescha a Bravuogn, bassist *Andy Meerstetter* stat a Cuira e batterist *Hans Conzett* ha ses tschaler a Ragaz. L'emprim concert ha la band absolvi l'atun 2005; dapi là demussan ils AndaRojo ina preschientscha surprendenta sin tribunas entaifer ed ordaifer il Grischun, augmentond viapli la cuminanza da fans. Il num da la gruppa è be apparentamain spagnol – en vardad sa constituescha el dals prenum dals singuls commembers. L'affinitad al mund spagnol è però dada: l'emprim november 2006 partan ils quatter per in lung viadi en l'America latina – cun la finamira d'approfondar e perfecziunar lur musica.